


Cu fayecimento di Hubert “Lio” Booy Aruba a perde su co-autor di himno di Aruba

ORANJESTAD(AAN)— Den weekend Departamento di Cultura Aruba (DCA) a ricibi e tristo noticia cu Sr. Hubert O. (Lio) Booy a bay laga nos, na un edad di 95 aña. Sr. Hubert Booy tabata e prome director di Instituto di Cultura Aruba cu awe ta Departamento di Cultura Aruba encarga cu e maneho cultural na Aruba. Tabata na cuminsamento di aña 1978 cu Gobierno Insular di Aruba, conseha door di Sr. Gilberto F. (Betico) Croes, a encarga Sr. Hubert (Lio) Booy pa prepara y coordina un departamento di cultura cu lo cay bou di Gobierno Insular di Aruba. Riba dia 30 di september 1978, Diputado di Cultura di e tempo ey, Sr. Nelson O. Oduber, a institui oficialmente e departamento aki y a dun’e un number na Papiamento, esta Instituto di Cultura Aruba (ICA). Na aña 1979, Gobierno Insular di Aruba a cumpra e edificio di Maria Convent cu ta keda banda di misa San Francisco na Playa, pa ubica ICA den dje. E meta cu a institui Insituto di Cultura Aruba tabata pa prepara e pueblo di Aruba culturalmente como anticipación di su Status Aparte. Despues di Status Aparte na aña 1986 e meta a cambia y a bira conservacion, mantencion



y promoción di nos cultura den un forma mas amplio y percura pa difusion cultural.

Sr. Hubert Booy su number ta Hubert Obdulio Booy y cariñosamente yama Lio. Tabata viudo di Sra. Flora Quintina Coronel d.f.m.. Biba na Kamerling Onnestraat 27 y a nace na Nikiboco, Bonaire riba dia 25 di juli 1919. Tata di un yiu hombre y 4 yiu muhe.

Preparacion:

- Educacion Basico y Avansa na Sint Bernardus School na Bonaire;

- Preparacion preseminario d.c.c. sacerdote;

Na aña 1937, Sr. Hubert Booy ta bin biba na Aruba;

Hubert a cuminsa traha na “Hollandsche Bank Unie” den aña 1937, den departamento di contabilidad. Despues a sigui diferente curso Hubert ta bira

“Algemene Procuratiehouder” di e Banco unda e lo a traha 23 aña largo. **Su Carera Profesional:**

Na 1960 a traha na Water- en Energie Bedrijf (“WEB”) den departamento di contabilidad; E mesun aña ta bira Hefe Suplente na Toeristenbureau, Hefe

Suplente na Arubaanse Voorlichtingsdienst (banda di e conocido poeta Nicolaas A. Piña Lampe),

Ta bira na 1963 Hefe di Departamento di Cultura y Educacion Cultuur en Opvoeding; Ta na 1978 ta haya e encargo di Hefe di Instituto di Cultura Aruba (ICA) y a keda eyan te cu el a bay cu pensioen den aña 1980.

Interesnan:

Hubert Booy tin conocimiento di diferente idioma entre otro Latin cu el a siña cerca Pader Rogmans na Noord. Ruso el a studia na Den Haag cerca e maestro

Natasha de Vries di Universidad di Sint Petersburg.

Despues nos lo amplia mas riba tur loke Sr. Hubert Lio Booy a haci na Aruba.

Aruba a perde un baluarte riba tereno cultural y co-autor di nos Himno Nacional “Aruba Dushi Tera”.

Departamento di Cultura Aruba, Director, Staf y Personal ta expresa palabra di condolencia na e yiunan, famia, amigonan, comunidad Boneriano y henter Aruba cu e fayecimento di Sr. Hubert O. (Lio) Booy. Cu Lio sosega na paz.

Diario. - (dialuna 22 di december 2014)